

摘藻堂四庫全書薈要

史部

欽定四庫全書薈要卷六千七百十二

史部

明史卷一百十九

大學士張廷玉等奉 敕修

列傳第七

諸王四

仁宗諸子

鄭王瞻埈

廬江王載堉

越王瞻墉

蘄王瞻垠

襄王瞻埈

棗陽王祐棖

荆王瞻垌

淮王瞻垌

滕王瞻垌

梁王瞻垌

衛王瞻垌

英宗諸子

德王見潯

許王見潯

秀王見潯

崇王見潯

吉王見潯

忻王見潯

徽王見潯

景帝子

懷獻太子見濟

憲宗諸子

悼恭太子祐極

岐王祐檢

益王祐楨

衡王祐楨

新樂王載璽

雍王祐檣

壽王祐楷

汝王祐桢

涇王祐楸

榮王祐樞

申王祐楷

孝宗子

蔚王厚燁

仁宗十子昭皇后生宣宗越王瞻墉襄王瞻埈李賢妃  
生鄭王瞻埈蘄王瞻垠淮王瞻墀張順妃生荆王瞻垵  
郭貴妃生滕王瞻埈梁王瞻垵衛王瞻埈

鄭靖王瞻埈仁宗第二子永樂二十二年九月封仁宗  
崩皇后命與襄王監國以待宣宗宣德元年帝征樂安  
仍命與襄王居守四年就藩鳳翔正統八年詔遷懷慶

留京邸明年之國瞻竣暴厲數斃人杖下英宗以御史  
周英為長史稍戢成化二年薨子簡王祁鏐嗣祁鏐之  
為世子也襄王朝京師經新鄉祁鏐不請命遣長史往  
迎英宗聞之不悅賜書責讓及嗣王多不法又待世子  
寡恩長史江萬程諫被責辱萬程以聞帝遣英國公張  
懋太監王允中齎敕往諭始上書謝罪弘治八年薨世  
子見滋母韓妃不為祁鏐所禮見滋悒悒先卒子康王  
祐杓嗣正德二年薨無子從弟懿王祐檠嗣十六年薨

子恭王厚烷嗣世宗幸承天厚烷迎謁於新鄉加祿三百石疏奏母閭太妃貞孝事跡詔付史館其後帝修齋醮諸王急遣使進香厚烷獨不遣嘉靖二十七年七月上書請帝修德講學進居敬窮理克已存誠四箴演連珠十章以神仙土木為規諫語切直帝怒下其使者於獄詔曰前宗室有謗訕者置不治茲復效尤王今之西伯也欲為為之後二年而有祐樞之事厚烷遂獲罪初祁鐸有子十人世子見滋次孟津王見蒞次東垣王見

頃見愼母有寵於祁鉞規奪嫡不得竊世子金冊以去  
祁鉞索之急因怨不復朝所為益不法祁鉞言之憲宗  
草為庶人及康王薨無子見愼子祐樞應及以前罪廢  
乃立東垣王子祐樞至是祐樞求復郡王爵怨厚烷不  
為奏乘帝怒撫厚烷四十罪以叛逆告詔駙馬中官即  
訊還報反無驗治宮室名號擬乘輿則有之帝怒曰厚  
烷訕朕躬在國驕傲無禮大不道削爵錮之鳳陽隆慶  
元年復王爵增祿四百石厚烷自少至老布衣蔬食世



子載堉篤學有至性痛父非罪見繫築土室宮門外席

藁獨處者十九年厚烷還邸始入宮萬厯十九年厚烷

薨載堉曰鄭宗之序盟津為長前王見慈既錫謚復爵

矣爵宜歸盟津後累疏懇辭禮臣言載堉雖深執讓節

然嗣鄭王已三世無中更理宜以載堉子翊錫嗣載堉

執奏如初乃以祐榘之孫載璽嗣而令載堉及翊錫以

世子世孫祿終其身子孫仍封東垣王二十二年正月

載堉上疏請宗室皆得儒服就試毋論中外職中式者

視才品器使詔允行明年又上歷算歲差之法及所著  
樂律書考辨詳確識者稱之卒謚端清崇禎中載璽子  
翊鍾以罪賜死國除廬江王載堙簡王元孫也崇禎十  
七年二月賊陷懷慶載堙整冠服端坐堂上賊至被執  
欲屈之厲聲曰吾天朝藩王肯降汝逆賊耶詬罵不屈  
遇害賊執其長子翊樞擁之北行三月過定興於旅店  
作絕命詞遂不食死

越靖王瞻墉仁宗第三子永樂二十二年封衡州未之

藩宣宗賜以昌平莊田正統四年薨妃吳氏殉謚貞惠  
無後

蘄獻王瞻垠仁宗第子初封靜樂王永樂十九年薨  
謚莊獻仁宗即位追加封謚無後

襄獻王瞻埈仁宗第五子永樂二十二年封莊敬有令  
譽宣德四年就藩長沙正統元年徙襄陽英宗北狩諸  
王中瞻埈最長且賢衆望頗屬太后命取襄國金符入  
宮不果召瞻埈上書請立皇長子令邸王監國募勇智

士迎車駕書至景帝立數日矣英宗還京師居南內又  
上書景帝宜旦夕省膳問安率羣臣朔望見無忘恭順  
英宗復辟石亨等誣于謙王文有迎立外藩語帝頗疑  
瞻嚙久之從宮中得瞻嚙所上二書而襄國金符固在  
太后閣中乃賜書召瞻嚙比二書於金膝入朝晏便殿  
避席請曰臣過汴汴父老遮道言按察使王綰賢以誣  
逮詔獄願皇上加察帝立出綰命為大理卿詔設襄陽  
護衛令有司為王營壽藏及歸帝親送至午門外握手

泣別瞻塋遂巡再拜帝曰叔父欲何言頓首曰萬方望  
治如饑渴願省刑薄斂帝拱謝曰敬受教目送出端門  
乃還四年復入朝命百官朝王於邸詔王詣昌平謁三  
陵及辭歸禮送加隆且敕王歲時與諸子得出城遊獵  
蓋異數也六年又召以老辭歲時存問禮遇之隆諸藩  
所未有成化十四年薨子定王祁墉嗣弘治元年薨子  
簡王見淑嗣三年薨子懷王祐材嗣好鷹犬蓄善馬往  
返南陽八百里日猶未晡妃父井海誘使殺人孝宗戒

諭戍海及其左右祐材好道術賜予無節又嘗與興邨  
爭地連逮七十餘家獄久不決大理卿汪綸兩解之乃  
得已十七年薨弟康王祐櫟嗣亦好道術嘉靖二十九  
年薨無子從子莊王厚頤由陽山王嗣定王曾孫也時  
王邸災先世蓄積一空頤尤折節為恭儉節祿以餉邊  
進金助三殿工兩賜書幣事嫡母王大妃及生母潘太  
妃以孝聞潘卒殯之東偏王大妃曰汝母有子社稷是  
賴無以我故避正寢厚頤泣曰臣不敢以非禮加臣母

及葬跣足扶櫬五十里士大夫過襄者皆為韋布交四十五年薨子靖王載堯嗣萬厯二十三年薨子翊銘嗣崇禎十四年張獻忠陷襄陽遇害初大學士楊嗣昌之視師也以襄陽為軍府增堞浚隍貯五省餉金及弓刀火器是年二月獻忠邀殺嗣昌使於道奪其符驗以數十騎紹入襄城夜半火作遲明賊大至執翊銘南城樓屬卮酒曰王無罪王死嗣昌得以死償王遂殺王及貴陽王常洪火城樓焚其屍賊去僅拾顱骨數寸妃妾輩

死者四十三人福清王常澄進賢王常淦走免事聞帝  
震悼命所司備喪禮謚曰忠王嗣昌朝怠王於荊州謁  
者謝之曰先生怠顧寡人願先之襄陽謂襄城之破罪  
在嗣昌也十七年以常澄嗣襄王寄居九江後徙汀州  
不知所終棗陽王祐樞憲王曾孫也材武善文章博涉  
星歷醫卜之書嘉靖初上書請考興獻帝世宗以其議  
發自宗人足厭服羣心褒之更請除宗人祿使以四民  
業自為生賢者用射策應科第寢不行時襄王祐櫝病



廢不視事承奉邵亨挾權自恣至捶死鎮寧王舅祐楸  
誘致之挾其目帝遣大理少卿袁宗儒偕中官錦衣往  
訊亨論死祐楸坐奪爵帝幸承天念祐楸前疏復之

荆憲王瞻垌仁宗第六子永樂二十二年封宣德四年  
就藩建昌宮中有巨蛇蜿蜒自梁垂地或凭王座瞻垌  
大懼請徙正統十年徙蘄州景泰二年上書請朝上皇  
不許四年薨子靖王祁鎬嗣天順五年薨子見瀟嗣靖  
王三子長見瀟次都梁王見溥樊山王見滢見瀟與見

溥同母怨母之暱見溥也錮母奪其衣食竟死出柩於  
竇召見溥入後園箠殺之紿其妃何氏入宮逼淫之從  
弟都昌王見潭妻茆氏美求通焉見潭母馬氏防之嚴  
見滿髡馬氏鞭之囊土塵見潭死械繫茆妃入宮嘗集  
惡少年輕騎微服涉漢水掠人妻女見潏懼其及也密  
聞於孝宗召至京帝御文華門命廷臣會鞠見滿引伏  
廢為庶人錮西內居二年見滿從西內撫奏見潏罪誣  
其與楚府永安王謀不軌帝遣使往按問不實見潏更

奏見瀟嘗私造弓弩與子祐柄有異謀驗之實賜見瀟  
死廢祐柄而以見溥子祐欄嗣為荆王時弘治七年也  
十七年薨謚曰和子端王厚烜嗣性謙和銳意典籍嘉  
靖中病辭祿不允令富順王厚焜攝朝謁厚焜和王第  
二子與弟永新王厚璜以能詩善畫名厚烜子永定王  
載堉長厚焜即謝攝事人尤以為賢嘉靖三十二年厚  
烜薨載堉已前卒其子恭王翊鉅嗣荆自靖王諸子交  
惡失令譽及厚烜兄弟感先世家難以禮讓訓飭宗人

見滌曾孫塔尤為折節恭謹以文行稱郡王女例請祿  
於朝載塔四女皆妻士人不請封嘗上應詔正禮二疏  
不報讀易窮理著大隱山人集子翊鉅翊銖翊鏐翊鑒皆工  
詩兄弟嘗共處一樓號花萼社翊鉅表再塔賢以訓諸  
子諸子不率教世子常泠尤殘恣翊鉅言於朝草為庶  
人隆慶四年翊鉅薨泠子常信嗣萬曆四年薨無子弟  
康王常盜由安城王嗣萬曆二十五年薨子定王由樊  
嗣天啓二年薨子慈煙嗣崇禎時流賊草裏眼左金王

說降於楚帥慈異欲與為好宴盛陳女樂十六年正月張獻忠陷蘄州慈異先一月薨賊圍王宮盡掠其所見妓樂去

淮靖王瞻墺仁宗第七子永樂二十二年封宣德四年就藩韶州英宗即位之十月以韶多瘴癘正統元年徙饒州正德十一年薨子康王祁銓嗣弘治十五年薨世子見濂早卒無子從子定王祐榘嗣游戲無度左右倚勢暴橫境內苦之長史莊典以輔導失職自免詔不許

推官汪文盛數持王府事有顧嵩者病狂持刀斧入王

門官校執詰之謬言出汪指使典白之守臣鎮守太監

黎安嘗以事至饒從騎入端禮門被撻銜祐榮甚先是

祐榮有名琴曰天風環珮寧王宸濠求之不得又求濱

湖地不與至是嗾安奏祐榮過失及文盛被誣事詔下

撫按訊安與宸濠謀不待報遽繫典及府中官校鞠之

典辭倨宸濠箠之斃獄中他所連坐甚衆於是祐榮奏

安挾仇殺典庇嵩帝遣都御史金獻民太監張欽往按

治祐祭畏宸濠不能自明欽等復言祐祭信奸徒為暴請嚴戒之軍校坐戍者二十餘人典寃竟不白嘉靖三年祐祭薨無子弟莊王祐楨嗣十六年薨子憲王厚燾嗣四十二年薨子恭王載垕嗣萬曆五年薨弟順王載堅嗣二十三年薨子翊鉞嗣翊鉞之末王也與妓王愛狎冒妾額入宮且令撫庶子常洪為子陳妃與世子常清俱失愛潛謀易嫡御史陳王道以理論王出之外舍常洪遂與宗人翊鉞等謀夜入王宮盜丹寶資貨以出

守臣上其事王愛論死勒常洪自盡翊鉏等削屬籍永  
錮奪翊鉏四歲祿久之薨子常清嗣國亡不知所終  
滕懷王瞻塏仁宗第八子永樂二十二年封雲南未之  
國洪熙元年薨無後

梁莊王瞻垧仁宗第九子永樂二十二年封宣德初詔  
鄭越襄荆淮五王歲給鈔五萬貫惟梁倍之四年就藩  
安陸故郢邸也襄王瞻璿自長沙徙襄陽道安陸與瞻  
垧留連不忍去瀕別瞻垧慟曰兄弟不復更相見奈何



左右皆泣下正統元年言府卑濕乞更塹地帝詔郢  
中歲歉俟有秋理之竟不果六年薨無子封除梁故得  
郢田宅園湖後皆賜襄王及睿宗封安陸盡得郢梁郢  
田供二王祠祀

衛恭王瞻埏仁宗第十子永樂二十二年封懷慶幼善  
病宣宗撫愛之未就藩歲時謁陵皆命攝祀孝謹好學  
以賢聞正統三年薨妃楊氏殉賜諡貞烈無子封除

英宗九子周太后生憲宗崇王見澤萬宸妃生德王見

潸及皇子見湜吉王見浚忻王見治王惠妃生許王見  
淳高淑妃生秀王見澍韋德妃生徽王見沛

德莊王見潸英宗第二子初名見清景泰三年封榮王  
天順元年三月復東宮同日封德秀崇吉四王歲祿各  
萬石初以德州改濟南成化三年就藩請得齊漢二庶  
人所遺東昌兗州閒田及白雲景陽廣平三湖地憲宗  
悉予之復請業南旺湖以漕渠故不許又請漢庶人舊  
牧馬地知府趙璜言地歸民間供稅賦已久不宜奪帝

從之正德初詔王府莊田畝徵銀三分歲為常見溝奏  
初年兗州莊田歲畝二十升獨清河一縣成化中用少  
卿宋旻議歲畝五升若如新詔臣將無以自給戶部執  
山東水旱相仍百姓凋敝宜如詔帝曰王何患貧其勿  
許十二年薨子懿王祐榕嗣嘉靖中戶部議覈王府所  
請山場湖陂斷自宣德以後者皆還官詔允行於是山  
東巡撫都御史邵錫奏德府莊田俱在草中與祐榕相  
訐奏錫持之益急儀衛司軍額千七百人逃絕者以餘

丁補錫謂非制檄濟南知府楊撫籍諸補充者勿與餉  
軍校大譁毀府門詔逮問長史楊穀楊孟法戍儀衛副  
薛寧及軍校陶榮諭王守侯度毋徇羣小滋多事論者  
謂錫故激致其罪不盡祐榕過云此十一年八月事至  
十八年涇歲二王復請得所草莊田祐榕援以為請詔  
仍與三湖地使自徵其課二年薨孫恭王載塏嗣萬曆  
二年薨子定王翊銘嗣十六年薨子常清嗣崇禎五年  
薨世子由樞嗣十二年正月

大清兵克濟南就執

見湜英宗第三子早卒復辟後不復追贈

許悼王見淳英宗第四子景泰三年封明年薨禮臣請用親王禮葬帝以王幼殺其制

秀懷王見討英宗第五子生於南宮天順元年封成化六年就藩汝寧長史劉誠獻千秋日鑒錄見澍朝夕誦之就藩時慮途中擾民令併日行王居隘左右請遷文廟廣之見澍不聽曰居近學宮時間絃頌聲顧不美乎

論書至西伯戡黎長史誠主吳氏說曰戡黎者武王也  
右長史趙稅主孔氏說曰實文王事爭之失色見澍曰  
經義未有定論不嫌往復今若此非先皇帝簡二先生  
意也成化八年薨無子封除

崇簡王見澤英宗第六子生於南宮天順元年封成化  
十年就藩汝寧故秀邸也弘治八年七月皇太后春秋  
高思一見王帝特敕召之禮部尚書倪岳言數年來三  
王之國道路供億民力殫竭今召王復來往返勞費兼

水溢旱蝗舟車所經恐有他虞親王入朝雖有故事自宣德來已鮮舉行英宗復辟襄王奉詔來朝雖篤敦叙之恩實塞疑讒之隙非故事也大學士徐溥亦以為言帝重違太后意不允既而言官交章及之乃已十八年薨子靖王祐樞嗣正德六年薨子恭王厚耀嗣三王并有賢名而靖王尤孝友嘉靖十六年厚耀薨子莊王載境嗣三十六年薨子端王翊燭嗣萬曆三十八年薨孫由棖嗣崇禎十五年閏十一月李自成陷汝寧執由棖

去偽封襄陽伯令諭降州縣之未下者由櫝不從殺之於泌陽城弟河陽王由材世子慈輝等皆遇害

吉簡王見浚英宗第七子生於南宮天順元年封時甫二歲成化十三年就藩長沙刻先聖圖及尚書於嶽麓書院以授學者嘉靖六年薨孫定王厚燭嗣請湘潭商稅益邸租不許十八年薨子端王載均由光化王嗣四十年薨子莊王翊鎮嗣隆慶四年薨無子庶兄宣王翊鑒由龍陽王嗣萬曆四十六年薨孫由棟嗣崇禎八年



薨子慈燿嗣十六年張獻忠入湖南同惠王走衡州隨入粵國亡後死於緬甸

忻穆王見治英宗第八子成化二年封未就藩八年薨無後

徽莊王見沛英宗第九子成化二年封十七年就藩鈞州承奉司自置吏左布政使徐恪革之見沛以聞憲宗書諭王置吏非制也恪無罪正德元年薨子簡王祐檮嗣嘉靖四年薨子恭王厚燾嗣二十九年薨子浦城王

載瑜嗣初厚燭好琴斲琴者與知州陳吉交惡厚燭庇之劾吉逮詔獄都御史駱昂御史王三聘白吉寃帝怒并逮之昂杖死三聘吉俱戍邊議者不直厚燭時方士陶仲文有寵於世宗厚燭厚結之仲文具言王忠敬奉道帝喜封厚燭太清輔元宣化真人予金印及載瑜嗣王益以奉道自媚於帝命綰其父真人印南陽人梁高輔自言能導引服食載瑜用其術和藥命高輔因仲文以進帝封高輔通妙散人載瑜清微翊教輔化忠孝真

人載瑜遂益恣壞民屋作臺榭苑囿庫官王章諫杖殺之嘗微服之揚州鳳陽為邏者所獲羈留三月走歸時高輔被上寵不復親載瑜載瑜銜之已而為帝取藥不得求載瑜向所蓄者載瑜不與而與仲文高輔大恨乘間言載瑜私往南中與他過失帝疑之奪真人印仲文知釁已成不復敢言三十五年有民耿安者奏載瑜奪其女下按治有司因發其諸不法事獄成降為庶人錮高牆時載瑜居宮中所司防守嚴獄詞不得聞及帝遣

內臣同撫按至始大懼登樓望龍亭後有紅板輿歎曰  
吾不能自明徒生奚為遂自經死妃沈氏次妃林氏爭  
取帛自縊子安陽王翊錡萬善王翊鋤并草爵及未封  
子女皆遷開封聽周王約束國除

景皇帝一子

懷獻太子見濟母杭妃始為郕王世子英宗北狩皇太  
后命立憲宗為皇太子而以郕王監國及郕王即位心  
欲以見濟代太子而難於發皇后汪氏又力以為不可

遲回久之太監王誠舒良為帝謀先賜大學士陳循高

穀百金侍郎江淵王一寧蕭鎡學士商輅半之用以緘

其口然猶未發也會廣西土官都指揮使黃瑄以私怨

戕其弟思明知府垵滅其家所司聞於朝瑄懼罪急遣

千戶袁洪走京師上疏勸帝早與親信大臣密定大計

易建東宮以一中外之心絕覬覦之望疏入景帝大喜

亟下廷臣會議且令釋瑄罪進階都督時景泰三年四

月也疏下之明日禮部尚書胡濙侍郎薩琦鄒幹集文

武羣臣廷議衆相顧莫敢發言惟都給事中李侃林聰御史朱英以為不可吏部尚書王直亦有難色司禮太監興安厲聲曰此事不可已即以為不可者勿署名無持兩端羣臣皆唯唯署議於是漢等暨魏國公徐承宗寧陽侯陳懋安遠侯柳溥石清侯石亨成安侯郭晟定西侯蔣琬駙馬都尉薛桓襄城伯李瑾武進伯朱瑛平鄉伯陳輔安鄉伯張寧都督孫鏜張軌楊俊都督同知田禮范廣過興衛穎都督僉事張輓劉深張通郭瑛劉

鑑張義錦衣衛指揮同知畢旺曹敬指揮僉事林福吏

部尚書王直戶部尚書文淵閣大學士陳循工部尚書

東閣大學士高穀吏部尚書何文淵戶部尚書金濂兵

部尚書于謙刑部尚書俞士悅左都御史王文王翺楊

善吏部侍郎江淵俞山項文耀戶部侍郎劉中敷沈翼

蕭鎡禮部侍郎王一寧兵部侍郎李賢刑部侍郎周宣

工部侍郎趙榮張敏通政使李錫通政欒憚王復參議

馮貫諸寺卿蕭維禎許彬蔣守約齊整李賓少卿張固

習嘉言李宗周蔚能陳誠黃士儁張翔齊政寺丞李茂  
李希安柴望鄺鏞楊詢王溢翰林學士商輅六科都給  
事中李讚李侃李春蘇霖林聰張文質十三道御史王  
震朱英涂謙丁泰亨強弘劉琚陸厚原傑嚴樞沈義楊  
宜王驥左鼎上言陛下膺天明命中興邦家統緒之傳  
宜歸聖子黃琬奏是制曰可禮部具儀擇日以聞即日  
簡置東宮官公孤詹事僚屬悉備五月廢汪后立杭妃  
為皇后更封太子為沂王立見濟為太子詔曰天佑下



民作之君實遺安於四海父有天下傳之子斯本固於  
萬年大赦天下令百官朔望朝太子賜諸親王公主邊  
鎮文武內外羣臣又加賜陳循高穀江淵王一寧蕭鎡  
商輅各黃金五十兩四年二月乙未太子冠十一月以  
御史張鵬言簡東宮師傅講讀官越四日太子薨謚曰  
懷獻葬西山天順元年降稱懷獻世子諸建議易儲者  
皆得罪

憲宗十四子萬貴妃生皇第一子栢賢妃生悼恭太子

祐極紀太后生孝宗邵太后生興獻帝祐杭岐王祐榆  
雍王祐樞張德妃生益王祐楨衡王祐禪汝王祐棖姚  
安妃生壽王祐楮楊恭妃生湮王祐楫申王祐楷潘端  
妃生榮王祐樞王敬妃生皇第十子第一子第三子皆  
未名殤

悼恭太子祐極憲宗次子成化七年立為皇太子薨  
岐憲王祐榆憲宗第五子成化二十三年與益衡雍三  
王同日封弘治八年之藩德安十四年薨無子封除

益端王祐檟憲宗第六子弘治八年之藩建昌故荆郎也性險約巾服澣至再日一素食好書史愛民重士無所侵擾嘉靖十八年薨子莊王厚燠嗣性朴素外物無所嗜三十五年薨無子弟恭王厚炫嗣自奉益儉辭祿二千石萬厯五年薨孫宣王翊鉞嗣嗜結客厚炫所積府藏悉斥以招賓從通聘問於諸藩不數年頓盡三十一年薨子敬王常遷嗣四十三年薨子由本嗣國亡竄

閩中

衡恭王祐輝憲宗第七子弘治十二年之藩青州嘉靖  
十七年薨子莊王厚燾嗣嘗辭祿五千石以贍宗室宗  
人德之隆慶六年薨子康王載圭嗣萬歷七年薨無子  
弟安王載封嗣十四年薨子定王翊鏞嗣二十年薨子  
常漁嗣新樂王載璽恭王孫也博雅善文辭索諸藩所  
纂述得數十種梓而行之又撰洪武聖政頌皇明政要  
諸書多可傳者從父高唐王厚煥齊東王厚炳皆以博  
學篤行聞嘉靖中賜敕獎諭者再

雍正王祐樞憲宗第八子初封保寧弘治十二年之藩  
衡州地卑濕宮殿朽敗不可居邸中數有異乞移山東  
東平州廷臣以擇地別建勞民傷財四川叙州有申王  
故府宜徙居之詔可既而以道遠不可徙正德二年地  
裂宮室壞王薨無子封除

壽定王祐楄憲宗第九子弘治四年與汝涇榮申四王  
同日封十一年就藩保寧正德元年以岐王世絕改就  
岐邸於德安校尉橫撓市民知府李重抑之奏逮重安

陸民劉鵬隨重詣大理對簿重未之識也訝之鵬曰太守仁為民受過民皆得効死豈待識乎重卒得白祐檣聞而悔之後以賢聞嘉靖二十四年薨無子除封

汝安王祐檣憲宗第十一子弘治十四年之藩衛輝正德十五年請預支食鹽十年為婚費詔別給長蘆鹽二千引食鹽如故世宗南巡迓於途甚恭加祿五百石錫金幣嘉靖二十年薨無子封除

涇簡王祐檣憲宗第十二子弘治十五年之藩沂州嘉

靖十六年薨子厚烱未封而卒無子封除

榮莊王祐樞憲宗第十三子正德初尚留京邸乞霸州  
信安鎮田故牧地也部臣言永樂中設立草場蕃育馬  
匹以資武備至成化中近偉始陳乞為莊後岐壽二府  
相沿莫之改正暨孝宗皇帝留神戎務清理還屯不以  
私廢公也今榮王就國有期所請宜勿與三年之藩常  
德祐樞狀貌類高帝居國稍驕縱世宗詔以沅江酉港  
天心園坪河泊稅入王邸嘉靖十八年薨孫恭王載堉

嗣萬厯二十三年薨子翊鈐嗣四十年薨子常滾嗣薨  
子憲王由棖嗣薨子慈炤嗣張獻忠入湖南奉母妃姚  
氏走辰溪不知所終

申懿王祐楷憲宗第十四子封叙州未就藩弘治十六  
年薨無子封除

孝宗二子武宗蔚王厚煒俱張皇后生

蔚悼王厚煒孝宗次子生三歲殤追加封謚



明史卷一百十九

欽定四庫全書

明史卷一百十九考證

詔曰前宗室謗訕者置不治

臣嚴福按何喬遠分藩

記嘉靖二十七年鎮國中尉周王孫勤熨者因得過  
奪祿乃上書極諫世宗怒降為庶人幽高牆詔所云  
前宗室謗訕者指此

天佑下民作之君實遺安於四海父有天下傳之子斯  
本固於萬年 臣嚴福按何喬遠分藩記詔書首二

語何文淵所屬對也英宗復位王誠舒良伏誅陳循  
江淵遣戍商輅蕭鎡等廷杖除名王直高穀皆致仕  
文淵先致仕至是革宮保懼禍自盡黃珌已前死捕  
其子誅之

岐惠王祐楨 臣嚴福按鄭曉同姓諸王傳祐楨弘治  
中請迎母養不許

嘉靖十八年薨 臣嚴福按何喬遠分藩記嘉靖十八  
年奸人班明誣昌國公張鶴齡通祐楨有異謀久之

得白

明史卷一百十九考證

欽定四庫全書管要卷六千七百十三 史部

明史卷一百二十

大學士張廷玉等奉 敕修

列傳第八

諸王五

世宗諸子

哀冲太子載基

莊敬太子載壑

景王載圳

穎王載塋

戚王載壘

薊王載墮

均王載夙

穆宗諸子

憲懷太子翊鉞

靖王翊鈐

潞王翊鏐

神宗諸子

邠王常淑

福王常洵

沅王常治

瑞王常浩

惠王常潤

桂王常瀛

光宗諸子

簡王由樞

齊王由楫

懷王由模

湘王由栩

惠王由禧

熹宗諸子

懷冲太子慈然

悼懷太子慈煇

獻懷太子慈炁



莊烈帝諸子

太子慈烺

懷王慈烺

定王慈烺

永王慈烺

悼靈王慈煥

悼懷王

世宗八子閭貴妃生哀冲太子載基王貴妃生莊敬太  
子載壑杜太后生穆宗盧靖妃生景王載圳江肅妃生  
潁王載皐趙懿妃生戚王載堊陳雍妃生薊王載墻趙  
榮妃生均王載夙

哀冲太子載基世宗第一子生二月而殤

莊敬太子載壑世宗第二子嘉靖八年世宗將南巡立  
為皇太子甫四歲命監國以大學士夏言為傅尚書霍  
韜郎中鄒守益獻東宮聖學圖冊疑為謗訕幾獲罪帝  
既得方士段朝用思習修攝術諭禮部具皇太子監國  
儀太僕卿楊最諫杖死監國之議亦罷贊善羅洪先趙  
時春唐順之請太子出閣講學文華殿皆削籍太廟成  
命太子攝祀二十八年三月行冠禮越二日薨帝命與

哀冲太子竝建寢園歲時祭祀從諸陵後

景恭王載圳世宗第四子嘉靖十八年冊立太子同日  
封穆宗裕王載圳景王其後太子薨廷臣言裕王次當  
立帝以前太子不永遲之晚信方士語二王皆不得見  
載圳既與裕王竝出邸居處衣服無別載圳年少左右  
懷窺覲語漸聞中外頗有異論四十年之國德安居四  
年薨帝謂大學士徐階曰此子素謀奪嫡今死矣初載  
圳之藩多請莊田部議給之荊州沙市不在請中中使

責市租知府徐學謨執不與又取薪稅於漢陽之劉家  
壩推官吳宗周持之皆獲譴其他土田湖陂侵入者數  
萬頃王無子歸葬西山妃妾皆還居京邸封除

潁殤王載堍世宗第五子生未踰月殤

戚懷王載璽世宗第六子

薊哀王載壻世宗第七子

均思王載珮世宗第八子三王俱未踰歲殤追加封謚  
穆宗四子李皇后生憲懷太子翊鉞孝定太后生神宗

潞王翊鏐其靖王翊鈴母氏無考

憲懷太子翊鉞穆宗長子生五歲殤贈裕世子隆慶元年追謚

靖悼王翊鈴穆宗第二子生未踰年殤贈藍田王隆慶元年追加封謚

潞簡王翊鏐穆宗第四子隆慶二年生生四歲而封萬曆十七年之藩衛輝初翊鏐以帝母弟居京邸王店王莊徧畿內比之藩悉以還官遂以內臣司之皇店皇莊

自此益侈翊鏐居藩多請贍田食鹽無不應者其後福藩遂緣為故事明初親王歲祿外量給草場牧地間有以廢壤河灘請者多不及千頃部臣得執奏不盡從也景王就藩時賜予槩裁省楚地曠多間田詔悉予之景藩除潞得景故籍田多至四萬頃部臣無以難至福王常洵之國版籍更定民力益絀尺寸皆奪之民間海內騷然論者推原事始頗以翊鏐為口實云翊鏐好文性勤飭恒以歲入輸之朝助工助邊無所惜帝益善之四

十二年皇太后哀問至翊繆悲慟廢寢食未幾薨世子  
常潞幼母妃李氏理藩事時福王奏請輒取中旨帝於  
王妃奏亦從中下示無異同部臣言王妃奏陳四事如  
軍校月糧之當給發義和店之預防侵奪義所當許至  
歲祿之欲先給王莊之欲更設則不當許且於王無絲  
豪益徒令邸中人日魚肉小民飽私囊將來本支千億  
請索日頻盡天府之版章給王邸而不足也不報四十六  
年常潞嗣崇禎中流賊擾秦晉河北常潞疏告急言

衛輝城卑土惡請選護衛三千人助守捐歲入萬金資  
餉不煩司農朝廷嘉之盜發王妃塚常涉上言賊延蔓  
漸及江北鳳泗陵寢可虞宜早行勦滅時諸藩中能急  
國難者惟周潞二王云後賊躡中州常涉流寓於杭順  
治二年六月降於我

大清

神宗八子王太后生光宗鄭貴妃生福王常洵沅王常  
治周端妃生瑞王常浩李貴妃生惠王常潤桂王常瀛



其邵王常淑永思王常溥母氏無考

邵哀王常淑神宗第二子生一歲殤

福恭王常洵神宗第三子初王皇后無子王妃生長子

是為光宗常洵次之母鄭貴妃最幸帝久不立太子中

外疑貴妃謀立己子交章言其事竄謫相踵而言者不

止帝深厭苦之二十九年始立光宗為太子而封常洵

福王婚費至三十萬營洛陽邸第至二十八萬十倍常

制廷臣請王之藩者數十百奏不報至四十二年始令

就藩先是海內全盛帝所遣稅使礦使遍天下月有進奉明珠異寶文毳錦綺山積他搜括贏羨億萬計至是多以資常洵臨行出宮門召還數四期以三歲一入朝下詔賜莊田四萬頃所司力爭常洵亦奏辭得減半中州腴土不足取山東湖廣田益之又奏乞故大學士張居正所沒產及江都至太平沿江荻洲雜稅並四川鹽井榷茶銀以自益伴讀承奉諸官假履畝為名乘傳出入河南北齊楚間所至騷動又請淮鹽千三百引設店

洛陽與民市中使至淮揚支鹽乾沒要求輒數倍而中州  
舊食河東鹽以改食淮鹽故禁非王肆所出不得鬻  
河東引遏不行邊餉由此絀廷臣請改給王鹽於河東  
且無與民市弗聽帝深居久羣臣章奏率不省獨福藩  
使通籍中左門一日數請朝上夕報可四方姦人亡命  
探風旨走利如驚如是者終萬厯之世及崇禎時常洵  
地近屬尊朝廷尊禮之常洵日閉閣飲醇酒所好惟婦  
女倡樂秦中流賊起河南大旱蝗人相食民間藉藉謂

先帝耗天下以肥王洛陽富於大內援兵過洛者喧言  
王府金錢百萬而令吾輩枵腹死賊手南京兵部尚書  
呂維祺方家居聞之懼以利害告常洵不為意十三年  
冬李自成連陷永寧宜陽明年正月參政王蔭昌帥衆  
警備總兵官王紹禹副將劉見義羅泰各引兵至常洵  
召三將入賜宴加禮越數日賊大至攻城常洵出千金  
募勇士縋而出用矛入賊營賊稍却夜半紹禹親軍從  
城上呼賊相笑語揮刀殺守堞者燒城樓開北門納賊

常洵縋城出匿迎恩寺翌日賊跡而執之遂遇害兩承  
奉伏尸哭賊梓之去承奉呼曰王死某不願生乞一棺  
收王骨蓋粉無所恨賊義而許之桐棺一寸載以斷車  
兩人即其旁自縊死王妃鄒氏及世子由崧走懷慶賊  
火王宮三日不絕事聞帝震悼輟朝三日令河南有司  
改殯十六年秋七月由崧襲封帝親擇宮中寶玉帶賜  
之明年三月京師失守由崧與潞王常潞俱避賊至淮  
安四月鳳陽總督馬士英等迎由崧入南京庚寅稱監

國以兵部尚書史可法戶部尚書高弘圖及士英俱為  
大學士士英仍督鳳陽軍務壬寅自立於南京號弘光  
命史可法督師江北召士英入分淮揚鳳廬為四鎮以  
總兵官黃得功劉良佐劉澤清高傑領之由崧性闇弱  
湛於酒色聲伎委任士英及士英黨阮大鍼擢至兵部  
尚書巡閱江防二人日以鬻官爵報私憾為事事詳諸  
臣傳中未幾有王之明者詐稱莊烈帝太子下之獄又  
有婦童氏自稱由崧妃亦下獄於是中外譁然明年三

月南寧侯左良玉舉兵武昌以救太子誅士英為名順  
流東下阮大鍼黃得功等帥師禦之而我

大清兵以是年五月己丑渡江辛卯夜由崧走太平蓋  
趨得功軍也壬辰士英挾由崧母妃奔杭州癸巳由崧  
至蕪湖丙申

大兵至南京城北文武官出降丙午執由崧至南京九  
月甲寅以歸京師

沅懷王常治神宗第四子生一歲殤

瑞王常浩神宗第五子初太子未立有三王竝封之旨  
蓋謂光宗福王及常浩也尋以羣臣爭遂寢二十九年  
東宮立與福惠桂三王同日封常洵以長先之藩常浩  
年已二十有五尚未選婚羣臣交章言率不報而日索  
部帑為婚費贏十八萬藏宮中且言冠服不能備天啟  
七年之藩漢中崇禎時流寇劇封地當賊衝七年上書  
言臣託先帝骨肉獲奉西藩未幾年而寇至比西賊再  
渡河闌入漢興破洵陽逼興安紫陽平利白河相繼陷



沒督臣洪承疇單騎裹甲出入萬山賊始敗遁臣捐犒  
軍振饑銀七千餘兩此時撫臣練國事移兵商洛按臣  
范復粹馳赴漢中近境稍寧既而鳳縣再陷蜀賊入秦  
州楚賊上興安六月遂犯郡界幸諸將憑江力拒賊方  
稍退臣在萬山絕谷中賊四面至覆亡無日臣肺腑至  
親藩封最僻而於寇盜至迫惟陛下哀憐常浩在宮中  
衣服禮秩降等好佛不近女色及寇逼秦中將吏不能  
救乞師於蜀總兵官侯良柱援之遂奔重慶隴西士大

夫多挈家以從十七年張獻忠陷重慶被執遇害時天無雲而雷者三從死者甚衆

惠王常潤神宗第六子福王之藩內廷蓄積為空中官藉諸王冠婚索部帑以實宮中所需輒數十萬珠寶稱是戶部不能給常潤與弟常瀛年二十皆未選婚其後兵事亟始減殺成禮天啟七年之藩荊州崇禎十五年十二月李自成再破彘陵荊門常潤走湘潭自成入荊州據之常潤之渡湘也遇風於陵陽磯宮人多漂沒身

僅以免就吉王於長沙十六年八月張獻忠陷長沙常  
潤走衡州就桂王衡州繼陷與吉王桂王走永州巡按  
御史劉熙祚遣人護三王入廣西以身當賊永州陷熙  
祚死之

桂端王常瀛神宗第七子天啟七年之藩衡州崇禎十  
六年衡州陷與吉惠二王同走廣西居梧州

大清順治二年

大兵平江南福王就擒在籍尚書陳子壯等將奉常瀛

監國會唐王自立於福建遂寢是年薨於蒼梧世子已  
先卒次子安仁王由稷亦未幾卒次由榔崇禎時封永  
明王三年八月

大兵取汀州執唐王聿鍵於是兩廣總督丁魁楚廣西  
巡撫瞿式耜巡按王化澄與舊臣呂大器等具推由榔  
監國母妃王氏曰吾兒不勝此願更擇可者楚魁等意  
益堅合謀迎於梧十月十四日監國肇慶以魁楚大器  
式耜為大學士餘授官有差是月

大兵取贛州內侍王坤倉卒奉由榔仍走梧州式耜等  
力爭乃回肇慶十一月唐王弟聿錕自閩浮海至粵時  
閩舊臣蘇觀生撒兵奔廣州與布政使顧元鏡總兵官  
林察等謀立聿錕偽號紹武與由榔相拒是月由榔亦  
自立於肇慶偽號永曆遣兵部侍郎林佳鼎討聿錕會  
大兵由福建取廣州執聿錕觀生自縊祭酒梁朝鍾太  
僕卿霍子衡等俱死肇慶大震王坤復奉由榔走梧州  
明年二月由平樂潯州走桂林魁楚棄由榔走岑溪降

於

大軍既而平樂不守由榔大恐會武岡總兵官劉承允  
以兵至全州王坤請赴之式耜力諫不聽乃以式耜及  
總兵官焦璉留守桂林封陳邦傳為思恩侯守昭平遂  
趨承允軍中三月封承允安國公錦衣指揮馬吉翔等  
為伯承允挾由榔歸武岡改曰奉天府政事皆決焉是  
時長沙衡永皆不守湖廣總督何騰蛟與侍郎嚴起恒  
走白牙市六月由榔遣官召騰蛟至密使除承允顧承

允勢盛騰蛟復還白牙

大兵由寶慶趨武岡馬吉翔等挾由榔走靖州承允舉城降由榔又奔柳州道出古泥總兵官侯性太監龐天壽帥舟師來迎會大雨饑餓性供帳甚備九月土舍覃鳴珂作亂大掠城中矢及由榔舟先是

大兵趨桂林焦璉拒守甚力又廣州有警

大兵東向桂林稍安既而湖南十三鎮將郝永忠盧鼎等俱奔赴桂林騰蛟亦至與式耜議分地給諸將使各

自為守璉已先復陽朔平樂陳邦傳復潯州合兵復梧州廣西全省略定十二月由榔返桂林五年二月

大兵至靈州郝永忠潰於興安奔還挾由榔走柳州

大兵攻桂林式耜騰蛟拒戰時南昌金聲桓等叛降於由榔八月由榔至肇慶六年春

大兵入湘潭何騰蛟死明年由榔走梧州是年十二月

大兵入桂林瞿式耜及總督張同敞死焉由榔聞報大懼自梧州奔南寧時孫可望已據滇黔受封為秦王八



年三月遣兵來衛殺嚴起恒等九年二月可望迎由榔入安隆所改曰安龍府久之日益窮促聞李定國與可望有隙遣使密召定國以兵來迎馬吉翔黨於可望偵知之大學士吳貞毓以下十餘人皆被殺事詳貞毓傳後二年李定國敗於新會將由安隆入滇可望患之促由榔移貴陽就已由榔故遲行定國至遂奉由榔由安南衛走雲南居可望署中封定國晉王可望以妻子在滇未敢動明年由榔送其妻子還黔遂舉兵與定國戰

於三岔可望將白文選單騎奔定國軍可望敗挈妻子  
赴長沙

大軍前降十五年三月

大軍三路入雲南定國阮雞公背斷貴州道別將守七  
星關抵生界立營以牽蜀師

大兵出遵義由水西取烏撒守將棄關走李定國連敗  
於安隆由榔走永昌明年正月三日

大兵入雲南由榔走騰越定國敗於潞江又走南甸二

十六日抵囊木河是為緬境緬勒從官盡棄兵仗始啟  
關至蠻莫二月緬以四舟來迎從官自覓舟隨行者六  
百四十餘人陸行者自故岷王子而下九百餘人期會  
於緬甸十八日至井亘黔國公沐天波等謀奉由榔走  
戶臘二河不果五月四日緬復以舟來迎明日發井亘  
行三日至阿瓦阿瓦者緬酋所居城也又五日至赭硃  
陸行者緬人悉掠為奴多自殺惟岷王子八十餘人流  
入暹羅緬人於赭硃置草屋居由榔遣兵防之十七年

定國文選與緬戰索其主連敗緬兵緬終不肯出由榔  
十八年五月緬酋第莽猛白代立紹從官渡河盟既至  
以兵圍之殺沐天波馬吉翔王維恭魏豹等四十有二  
人詳任國璽傳存者由榔與其屬二十五人十二月  
大兵臨緬白文選自木邦降定國走景線緬人以由榔  
父子送

軍前明年四月死於雲南六月李定國卒其子嗣興等  
降

永思王常溥神宗第八子生二歲殤

光宗七子王太后生熹宗簡王由櫟王選侍生齊王由  
楫李選侍生懷王由模劉太后生莊烈皇帝定懿妃生  
湘王由相敬妃生惠王由楷

簡懷王由櫟光宗第二子生四歲殤

齊思王由楫光宗第三子生八歲殤

懷惠王由模光宗第四子生五歲殤

湘懷王由相光宗第六子

惠昭王由楷光宗第七子俱早殤五王皆追加封謚  
熹宗三子懷冲太子慈然不詳其所生母皇貴妃范氏  
生悼懷太子慈煇容妃任氏生獻懷太子慈炁  
懷冲太子慈然熹宗第一子

悼懷太子慈煇熹宗第二子

獻懷太子慈炁熹宗第三子與懷冲悼懷皆殤

莊烈帝七子周皇后生太子慈娘懷隱王慈烜定王慈  
烜田貴妃生永王慈炤悼懷王慈煥悼懷王及皇七子

太子慈娘莊烈帝第一子崇禎二年二月生九月立為

皇太子十年預擇東宮侍班講讀官命禮部尚書姜逢

元詹事姚明恭少詹王鐸屈可伸侍班禮部侍郎方逢

年諭德項煜修撰劉理順編修吳偉業楊廷麟林曾志

講讀編修胡守恒楊士聰校書十一年二月太子出閣

十五年正月開講閣臣條上講儀七月改慈慶宮為端

本宮慈慶懿安皇后所居也時太子年十四議明歲選

婚故先為置宮而移懿安后於仁壽殿既而以寇警暫

停京師陷賊獲太子偽封宋王及賊敗西走太子不知  
所終由崧時有自北來稱太子者驗之以為駙馬都尉  
王曷孫王之明者偽為之繫獄中南京士民譁然不平  
袁繼咸及劉良佐黃得功輩皆上疏爭左良玉起兵亦  
以救太子為名一時真偽莫能知也由崧既奔太平南  
京亂兵擁王之明立之越五日降於我

大清

懷隱王慈烜莊烈帝第二子殤



定王慈炯莊烈帝第三子崇禎十四年六月諭禮臣朕第三子年已十齡敬遵祖制宜加王號但既受冊封必具冕服而會典開載年十二或十五始行冠禮十齡受封加冠二禮可竝行乎於是禮臣厯考經傳及本朝典故以奉定於是歲冊封越二年行冠禮九月封為定王十一月選新進士為檢討國子助教等官為待詔克王講讀官以兩殿中書充侍講十七年京師陷不知所終永王慈炤莊烈帝第四子崇禎十五年三月封永王賊

陷京師不知所終

悼靈王慈煥莊烈帝第五子生五歲而病帝視之忽云  
九蓮菩薩言帝待外戚薄將盡殤諸子遂薨九蓮菩薩  
者神宗母考定李太后也太后好佛宮中像作九蓮座  
故云帝念王靈異封為孺孝悼靈王元機慈應真君命  
禮臣議孝和皇太后莊妃懿妃道號禮科給事中李焞  
言諸后妃祀奉先殿不可崇邪教以亂徽稱不聽十六  
年十二月改封宣顯慈應悼靈王去真君號

悼懷王莊烈帝第六子生二歲殤第七子生三歲殤名俱無考

贊曰封建之不可行於後世也信矣明太祖建立親藩大封諸子方謂枝葉相維根本益固乃一傳而有燕王之變篡奪之禍起不旋踵厥後高煦宸濠逆謀屢動非所謂最强則最先反者歟中葉以來矯枉過正防閑之峻至於二王不得相見省墓請而後許識者譏焉降及末季盜賊充斥社稷之危在於呼吸而起兵動王者且

援祖制以罪之諸王之據名城擁厚貨東手就戮所在  
皆是其能資捍禦者誰耶維屏維翰之謂何吁亦可鑒  
已

明史卷一百二十

欽定四庫全書

明史卷一百二十考證

景恭王載圳傳載圳年少左右懷窺覬語漸聞中外頗有異論臣嚴福按是時中允郭希顏落職家居有安儲一疏給事藍璧等奏希顏怨望傾險論死見明實錄謹附識

福王常洵傳紹禹親軍從城上呼賊相笑語揮刀殺守堞者燒城樓開北門納賊臣嚴福按自成聞福藩

富為謀已久適陝西叛兵逃至河南陰為自成內應  
故一夕而陷見紀事本末謹附識

瑞王常浩傳有三王並封之旨  
臣嚴福按三王並封

之命在萬厯二十一年輔臣王錫爵密疏以建儲請  
乃有是命見紀事本末謹附識

桂端王常瀛傳遣兵部侍郎林佳鼎討聿鏐  
臣嚴福

按是時佳鼎與廣州將陳際泰戰於三水際泰敗既  
與林察戰於海口全軍俱沒佳鼎死之見紀事本末

定王慈炯傳不知所終

臣嚴福按京師陷時自成羈

太子二王於宮中皆不屈及賊出奔時挾之去不知所終見紀事本末



明史卷一百二十考證



總校官編修臣吳紹濬

欽定四庫全書薈要

史部

明史卷一百二十一

三

詳校官員外郎

臣

楊世綸



欽定四庫全書薈要卷六千七百十四

史部

明史卷一百二十一

大學士張廷玉等奉 敕修

列傳第九

公主

明制皇姑曰大長公主皇姊妹曰長公主皇女曰公主  
俱授金冊祿二千石壻曰駙馬都尉親王女曰郡主郡  
王女曰縣主孫女曰郡君曾孫女曰縣君元孫女曰鄉

君壻皆儀賓郡主祿八百石餘遞減有差郡主以下恩禮既殺無足書者今依前史例作公主傳而駙馬都尉附焉

仁祖二女

太祖十六女

福成慶陽二主附

興宗四女

成祖五女

仁宗七女

宣宗二女

英宗八女

景帝一女

憲宗五女

孝宗三女

睿宗二女

世宗五女

穆宗六女

神宗十女

光宗九女

熹宗二女

莊烈帝六女

仁祖二女

太原長公主淳皇后所生嫁王七一早卒洪武三年追冊並贈七一榮祿大夫駙馬都尉遣使具衣冠改葬於盱眙

曹國長公主太原主母妹嫁李貞主性純孝助貞理家尤勤儉早卒貞攜子文忠避兵依太祖於滁陽洪武元年二月追冊主為孝親公主封貞恩親侯駙馬都尉先是兵亂主未葬命有司具禮葬於李氏先墓詔曰公主祠堂碑亭其制悉視功臣之贈爵為王者三年改冊主隴西長公主五年以文忠貴加冊曹國長公主並進貞右柱國曹國公性孝友恭謹初文忠守嚴州時屢以征伐事出皆委貞權掌軍務文忠克桐廬以所俘卒送嚴

嚴城空虛俘卒謀叛去貞饗其衆醉而縛之以歸應天  
太祖嘉之累授官如子爵賜甲第西華門元津橋之西  
帝數臨幸太子諸王時往起居親重無與比晚歲尤折  
節謙抑嘗曰富貴而忘貧賤君子不為也十二年冬卒  
贈隴西王謚恭獻文忠自有傳

太祖十六女

附福成慶陽二主

臨安公主洪武九年下嫁李祺韓國公善長子也是時  
始定公主婚禮先期賜駙馬冠誥竝朝服儀從甚盛主



執婦道甚備祺功臣子帝長壻頗委任之四方水旱每命祺往振濟二十三年善長坐事死祺與主徙江浦祺於永樂元年卒主至永樂十九年薨

寧國公主孝慈皇后生洪武十一年下嫁梅殷殷字伯殷汝南侯思祖從子也天性恭謹有謀畧便弓馬太祖十六女諸駙馬中尤愛殷時李文忠以上公典國學而殷視山東學政賜敕褒美謂殷精通經史堪為儒宗當世皆榮之帝春秋高諸王強盛殷嘗受密命輔皇太孫

及燕師日逼惠帝命殷充總兵官鎮守淮安悉心防禦  
號令嚴明燕兵破何福軍執諸將平安等遣使假道於  
殷以進香為名殷答曰進香皇考有禁不遵者為不孝  
王大怒復書言今興兵誅君側惡天命有歸非人所能  
阻殷割使者耳鼻縱之曰留汝口為殿下言君臣大義  
王為氣沮而鳳陽守徐安亦拆浮橋絕舟楫以遏燕燕  
兵乃涉泗出天長取道揚州王即帝位殷尚擁兵淮上  
帝迫公主齧血為書投殷殷得書慟哭乃還京既入見

帝迎勞曰駙馬勞苦殷曰勞而無功耳帝默然永樂二年都御史陳瑛奏殷畜養亡命與女秀才劉氏朋邪詛咒帝曰朕自處之因諭戶部考定公侯駙馬伯儀仗從人之數而別命錦衣衛執殷家人送遼東明年冬十月殷入朝前軍都督僉事譚深錦衣衛指揮趙曦擠殷簋橋下溺死以殷自投水聞都督同知許成發其事帝怒命法司治深曦罪斬之籍其家遣官為殷治喪謚榮定而封許成為永新伯初公主聞殷死謂上果殺殷牽衣

大哭問駙馬安在帝曰為主跡賊無自苦尋官殷二子  
順昌為中府都督同知景福為旗手衛指揮使賜公主  
書曰駙馬殷雖有過失兄以至親不問比聞溺死兄甚  
疑之都督許成來首已加爵賞謀害之人悉置重法特  
報妹知之鄂爾和者降人也事殷久謂深曦實殺殷請  
於帝斷二人手足剖其腸祭殷遂自經死十二月進封  
公主為寧國長公主宣德九年八月薨年七十一初主  
聞成祖舉兵貽書責以大義不答成祖至淮北貽主書

命遷居太平門外勿罹兵禍主亦不答然成祖故重主  
即位後歲時賜與無算諸王莫敢望殷孫純成化中舉  
進士知定遠縣忤上官棄歸襲武階為中都副留守  
宗寧公主洪武十七年下嫁牛城未幾薨

安慶公主寧國主母妹洪武十四年下嫁歐陽倫倫頗  
不法洪武末茶禁方嚴數遣私人販茶出境所至繹騷  
雖大吏不敢問有家奴周保者尤橫輒呼有司科民車  
至數十輛過河橋巡檢司擅捶辱司吏吏不堪以聞帝

大怒賜倫死保等皆伏誅

汝寧公主洪武十五年與懷慶大名二主先後下嫁而主下嫁陸賈吉安侯仲亨子也

懷慶公主母成穆孫貴妃下嫁王寧寧壽州人既尚主掌後軍都督府事建文中嘗洩中朝事於燕籍其家繫錦衣衛獄成祖即位稱寧孝於太祖忠於國家正直不阿橫遭誣構封永春侯予世券寧能詩頗好佛常侍帝燕語勸帝誦佛經飯僧為太祖資福帝不憚自是恩禮

漸衰久之坐事下獄見原卒子貞亮官羽林前衛僉事  
先寧卒宣德十年貞亮子葵援詔書言公主嫡孫當嗣  
侯不許命以衛僉事帶俸奉主祀寧又有子貞慶工詩  
與劉溥等稱十才子

大名公主下嫁李堅堅武陟人父英洪武初為驍騎右  
衛指揮僉事從征雲南陣沒贈指揮使堅有才勇既尚  
主掌前軍都督府事建文初以左副將軍從伐燕及戰  
勝負略相當封灤城侯子世泰濬沱河之戰燕卒薛祿

刺堅墮馬被禽械送北平道卒子莊年七歲嗣侯成祖  
即位莊父姓名在姦黨中以主故獲宥主懼禍遂納侯  
誥券宣德元年主薨莊在南京師事劉溥放浪詩酒以  
壽終

福清公主母鄭安妃洪武十八年下嫁張麟鳳翔侯龍  
子也麟未嗣侯卒永樂十五年主薨

壽春公主洪武十九年下嫁傅忠賴國公友德子也先  
是九年二月定制公主未受封者歲給紵絲紗絹布線



已封賜莊田一區歲徵租一千五百石鈔二千貫主為太祖所愛賜吳江縣田一百二十餘頃皆上腴歲入八千石踰他主數倍二十一年薨賜明器儀仗以葬十公主早薨

南康公主洪武二十一年下嫁胡觀東川侯海子也海常以罪奪祿田及觀尚主詔給田如故觀初在選中帝命黃巖徐宗實教之既婚督課益嚴又為書數千言引古義相戒勸觀執弟子禮甚恭太祖為大喜建文三年

觀從李景隆北征為燕兵所執永樂初奉使晉府還科  
道官劾觀僭乘晉王所賜輓輿詔姑宥之已都御史陳  
瑛等劾觀強取民間子女又娶娼為妾且言預知李景  
隆逆謀陛下曲加寬宥絕無悛心宜正其罪遂罷觀朝  
請尋自經死宣德中主為子忠乞嗣詔授孝陵衛指揮  
僉事進同知正統三年主薨

永嘉公主母郭惠妃洪武二十二年下嫁郭鎮武定侯  
英子也英卒鎮不得嗣宣德十年主乞以子珍嗣語在

英傳景泰六年主薨世宗即位元孫勛有寵為主乞追謚特賜謚貞懿

十三公主早薨

含山公主母高麗妃韓氏洪武二十七年下嫁尹清建文初清掌後府都督事先主卒主至天順六年始薨年八十有二

汝陽公主永嘉主同母妹與含山主同年下嫁謝達達父彥鳳陽人少育於孫氏冒其姓數從征討有功累官

前軍都督僉事詔復謝姓選其子尚主仁宗即位主以屬尊與寧國懷慶大名南康永嘉含山寶慶七主皆進稱大長公主自後諸帝即位公主進封長公主大長公主皆如制

寶慶公主太祖最幼女下嫁趙輝輝父和以千戶從征安南陣沒輝襲父官先是成祖即位主甫八歲命仁孝皇后撫之如女永樂十一年輝以千戶守金川門年二十餘狀貌偉麗遂選以尚主主既為后所撫裝齎視他

主倍渥婚夕特詔皇太子送入邸主性純淑宣德八年薨輝至成化十二年始卒凡事六朝歷掌南京都督及宗人府事家故豪侈姬妾至百餘人享有富貴者六十餘年壽九十

福成公主南昌王女母王氏嫁王克恭克恭嘗為福建行省參政後改福州衛指揮使

慶陽公主蒙城王女嫁黃琛琛本名寶武昌人以帳前參隨舍人擢兵馬副指揮太祖愛其謹厚配以王女累

從征討積功至龍江翼守禦千戶洪武元年冊兩王女  
為公主授克恭琛為駙馬都尉遷琛淮安衛指揮使四  
年三月禮官上言皇姪女宜改封郡主克恭琛當上駙  
馬都尉誥帝曰朕惟姪女二人不忍遽加降奪其稱公  
主駙馬如故公主歲給祿米五百石視他主減三之二  
駙馬止食本官俸擢琛中都留守卒官子鉉至都督僉  
事主至建文時改封慶成郡主燕師南下主嘗詣軍中  
議和益成祖從姊或謂福成慶陽皆太祖從姊者誤也

興宗四女

江都公主洪武二十七年下嫁耿璿長興侯炳文子也  
累官前軍都督僉事主為懿文太子長女初稱江都郡  
主建文元年進公主璿為駙馬都尉炳文之伐燕也璿  
嘗勸直搗北平會炳文罷歸謀不用永樂初稱疾不出  
坐罪死主復降為郡主憂卒

宜倫郡主永樂十五年下嫁于禮

三女無考

南平郡主未下嫁永樂十年薨追冊

成祖五女

永安公主下嫁袁容容壽州人父洪以開國功臣都督  
洪武二十八年選容為燕府儀賓配永安郡主燕兵起  
有戰守功永樂元年進郡主為公主容駙馬都尉再論  
功封廣平侯祿一千五百石予世券凡車駕巡幸皆命  
容居守初都指揮欵台乘馬過容門容怒其不下箠之  
幾死帝聞之賜趙王高燧書曰自洪武來往來駙馬門



者未聞令下馬也昔晉王敦為駙馬縱恣暴橫卒以滅  
亡汝其書示容令械辱款台之人送京師容乃由是斂  
戢十五年主薨停容侯祿宣宗即位復故卒贈沂國公  
謚忠穆子貞嗣卒無子庶弟瑄正統初乞嗣帝曰容封  
以公主恩禎嗣以公主子瑄庶子可長陵衛指揮僉事  
天順元年詔復侯爵卒弟琇成化十五年嗣卒姪輅乞  
嗣侯言官持不可帝曰詔書許子孫嗣輅容孫也輅後  
母嗣仍世衛僉事輅卒子夔弘治間乞嗣侯不許

永平公主下嫁李讓讓舒城人與袁容同歲選為燕府儀賓燕兵起帥府兵執謝貴等取大寧戰白溝河有功署掌北平布政司事佐仁宗居守其父申官留守左衛指揮同知惠帝欲誘致讓曰讓來吾宥爾父讓不從力戰破平安兵帝遂殺申籍其家姻族皆坐死或徙邊永樂元年進讓駙馬都尉封富陽侯食祿千石掌北京行部事卒贈景國公謚恭敏子茂芳嗣後仁宗即位以茂芳母子在先帝時有逆謀廢為庶人追奪其父讓并三

代誥券毀之是年茂芳死正統九年主薨天順元年詔  
與茂芳子輿伯爵卒成化間授輿子欽長陵衛指揮僉  
事

安成公主文皇后生成祖即位下嫁宋琥西寧侯晟子  
也正統八年主薨

咸寧公主安成主同母妹永樂九年下嫁宋瑛琥弟也  
襲西寧侯正統五年主薨十四年瑛與武進伯朱冕禦  
額森於陽和戰死

常寧公主下嫁沐昕西平侯英子主恭慎有禮通孝經  
女則正統六年薨年二十有二

仁宗七女

嘉興公主昭后生宣德三年下嫁井源正統四年先薨  
後十年源死土木之難

慶都公主宣德三年下嫁焦敬正統五年薨

清河公主宣德四年下嫁李銘八年薨

真定公主母李賢妃與清河主同年下嫁王誼景泰元

金史卷一百二十一  
年薨

德安公主早薨仁宗即位之十月與蘄王瞻垠同日追封謚悼簡冊辭謂第四女蓋早殤名次未定也又五女延平公主六女德慶公主俱未下嫁薨

宣宗二女

順德公主正統二年下嫁石璟璟昌黎人天順五年曹欽反璟帥衆殺賊禽其黨托克托詔獎勞成化十四年奉祀南京踰年卒

常德公主章皇后生正統五年下嫁薛桓成化六年薨  
英宗八女

重慶公主與憲宗同母天順五年下嫁周景景字德彰  
安陽人好學能書英宗愛之間燕遊幸多從憲宗立命  
掌宗人府事居官廉慎詩書之外無所好主事舅姑甚  
孝衣履多手製歲時拜謁如家人禮景每早朝主必親  
起視飲食主之賢近世未有也弘治八年景卒又四年  
主薨年五十四子賢歷官都指揮僉事有聲

嘉善公主母王惠妃成化二年下嫁王增兵部尚書驥孫也弘治十二年薨

淳安公主成化二年下嫁蔡震震行醇謹正德中劉瑾下獄詔廷訊有問者瑾輒指其人附已廷臣無敢詰震厲聲曰我皇家至戚應不附爾趣獄卒考掠之瑾乃服罪以是知名嘉靖中卒贈太保謚康僖

崇德公主母楊安妃成化二年下嫁楊偉興濟伯善孫也弘治二年薨

廣德公主母萬宸妃成化八年下嫁樊凱二十年八月薨

宜興公主母魏德妃成化九年下嫁馬誠正德九年薨  
隆慶公主母高淑妃成化九年下嫁游泰十五年薨

嘉祥公主母妃劉氏成化十三年下嫁黃鏞後六年薨  
景帝一女

固安公主英宗復辟降稱郡主成化時年已長憲宗以  
閣臣奏五年十一月下嫁王憲禮儀視公主以故尚書



塞義賜第賜之

憲宗五女

仁和公主弘治二年下嫁齊世英嘉靖二十三年薨

永康公主弘治六年下嫁崔元元代州人世宗入繼以

迎立功封京山侯給誥券禮部言奉迎乃臣子之分遽

膺封爵無故事帝曰永樂初年太宗入繼大統駙馬都

尉王寧以翊戴功封永春侯何得言無故事給事中底

蘊御史高越等連章論其不可皆不聽已坐張延齡事

下詔獄尋釋元好文文士播聲譽寵幸優渥勛臣戚畹  
莫敢望焉嘉靖二十八年卒贈左柱國太傅兼太子太  
傅謚榮恭駙馬都尉贈官不以軍功自元始主先元薨  
德清公主弘治九年下嫁林岳岳字鎮卿應天人少習  
舉子業奉母孝撫弟巒極友愛主亦有賢行事姑如齊  
民禮岳卒於正德十三年主孀居三十六年始薨  
長泰公主成化二十三年薨追冊

仙遊公主弘治五年薨追冊

孝宗三女

太康公主弘治十一年薨未下嫁

永福公主嘉靖二年下嫁鄔景和景和崑山人嘗奉旨  
直西苑撰元文以不諳元理辭帝不悅時有事清馥殿  
在直諸臣俱行祝釐禮景和不俟禮成而出已而賞賚  
諸臣景和與馬疏言無功受賞懼增罪戾乞容辭免俾  
洗心滌慮以効他日馬革裹尸銜環結草之報帝大怒  
謂詛咒失人臣禮削職歸原籍時主已薨矣三十五年

入賀聖誕畢因言臣自五世祖寄籍錦衣衛世居北地  
今被罪南徙不勝犬馬戀主之私扶服入賀退而私省  
公主墳墓邱封翳然荆棘不剪臣切自念狐死尚正首  
邱臣託命貴主獨與逝者魂魄相弔於數千里外不得  
春秋祭掃拊心傷悔五內崩裂臣之罪重不敢祈恩惟  
陛下幸哀故主使得寄籍原衛長與相依死無所恨帝  
憐而許之隆慶二年復官卒贈少保謚榮簡

永淳公主下嫁謝詔

金史卷一百二十一  
睿宗二女

長寧公主早薨

善化公主早薨嘉靖四年二主同日追冊

世宗五女

常安公主未下嫁嘉靖二十八年薨追冊

思永公主後常安主二月薨年十二追冊

寧安公主嘉靖三十四年下嫁李和

歸善公主嘉靖二十三年薨追冊  
葬祭祀太康主

嘉善公主嘉靖三十六年下嫁許從誠四十三年薨

穆宗六女

蓬萊公主早薨

太和公主早薨隆慶元年與蓬萊主同日追冊

壽陽公主萬曆九年下嫁侯拱辰國本議起拱辰掌宗人府亦具疏力爭卒贈太傅謚榮康

永寧公主下嫁梁邦瑞萬曆三十五年薨

瑞安公主神宗同母妹萬曆十三年下嫁萬煒崇禎時

主累加大長公主所產子及庶子長祚弘祚皆官都督  
煒官至太傅管宗人府印嘗以親臣侍經筵每文華進  
講佩刀入直李建泰西征命煒以太牢告廟年七十餘  
矣國變同子長祚死於賊弘祚投水死長祚妻李氏亦  
赴井死

延慶公主萬曆十五年下嫁王昺昺嘗救御史劉光復  
觸帝怒削職光宗立復官

神宗十女

榮昌公主萬厯二十四年下嫁楊春元四十四年春元卒久之主薨

壽寧公主二十七年下嫁冉興讓主為神宗所愛命五日一來朝恩澤異他主崇禎時洛陽失守莊烈帝命興讓同太監王裕民給事中葉高標往慰福世子於河北都城陷興讓死於賊

靜樂雲和雲夢靈邱仙居泰順香山天台八公主皆早世追冊



光宗九女

懷淑公主七歲而薨追冊餘五女皆早世未封

寧德公主下嫁劉有福

遂平公主天啓七年下嫁齊贊元崇禎末贊元奔南京

主前薨

樂安公主下嫁鞏永固字洪圖宛平人永固好讀書負才氣崇禎十六年二月帝召公侯伯於德政殿言祖制勛臣駙馬入監讀書習武經弓馬諸臣各有子弟否成

國公朱純臣定國公徐允楨等皆以幼對而永固獨上  
疏請肄業太學帝褒答之總督趙光抃以邊事繫獄特  
疏申救又請復建文皇帝廟謚事雖未行時論譁焉甲  
申春賊破宣大李邦華請太子南遷為異議所格及事  
急帝密召永固及新樂侯劉文炳護行叩頭言親臣不  
藏甲臣等難以空手搏賊皆相向涕泣十九日都城陷  
時公主已薨未葬永固以黃繩縛子女五人繫柩旁曰  
此帝甥也不可汙賊手舉劍自刎闔室自焚死

熹宗二女皆早世

莊烈帝六女

坤儀公主周皇后生追謚

長平公主年十六帝選周世顯尚主將婚以寇警停城  
陷帝入壽寧宮主牽帝衣哭帝曰汝何故生我家以劍  
揮斫之斷左臂又斫昭仁公主於昭仁殿越五日長平  
主復甦

大清順治二年上書言九死臣妾跼蹐高天願髮緇空

王稍申罔極

詔不許命顯復尚故主土田卹等金錢車馬錫予有加主涕洟踰年病卒

賜葬廣寧門外餘三女皆早世無考

明史卷一百二十一

欽定四庫全書

明史卷一百二十一考證

曹國長公主傳貞攜子文忠避兵依太祖於滁陽

臣

方煒按貞攜文忠赴滁帝詢其生計對曰苦漁稅後  
三年蠲河西數郡漁稅以貞故也見識大錄謹附識  
大名公主傳燕卒薛祿刺堅墮馬被禽械送北平

臣

方煒按洪武中堅嘗與駙馬梅殷歐陽倫陸賢等賑  
北平見鄭曉異姓諸侯傳謹附識

福清公主傳下嫁張麟鳳翔侯龍子也

臣方煒按龍

濠州人洪武十二年以都督僉事從平西藩論功封侯十七年從平雲南加祿五百石世襲三十年薨見王世貞高帝功臣表謹附考

南康公主傳下嫁胡觀東川侯海子也海嘗以罪奪祿田臣方煒按海以罪奪祿田事海本傳及他書俱無可考謹識

江都公主傳會炳文罷歸

臣方煒按是時炳文以二

十萬衆敗於滹沱河惠帝召還以李景隆代之見鄭  
曉異姓諸侯傳所云炳文罷歸即指此謹附識

永平公主傳仁宗即位以茂芳母子在先帝時有逆謀  
廢為庶人 臣方煒按傳所稱茂芳母子逆謀查王

世貞恩澤公侯伯表及諸書皆無可考謹識

安成公主傳下嫁宋琥西寧侯晟子也 臣方煒按王

世貞明盛事述西寧侯晟子琥瑛一時尚公主拜駙  
馬都尉相繼嗣父爵掛平羌將軍印鎮守甘肅又按



何喬遠勲封記亦云宣德六年琥嗣侯洪熙元年奪侯與瑛是琥固先襲侯也傳未詳載謹附考

常寧公主傳下嫁沐昕西平侯英子臣方煒按昕為

英少子累掌南京都督府以壽考終見明世法錄謹

附識

嘉興公主傳源死土木之難臣方煒按源以土木死

事景泰初贈鉅鹿侯見明實錄謹附考

重慶公主傳下嫁周景臣方煒按景鴻臚寺卿周顥

子景尚主後詔顓遷一官帶俸不任事見王世貞明  
異典述謹附識

嘉善公主傳下嫁王增兵部尚書驥孫也臣方煒按

王增考驥本傳作王添何喬遠勲封記及王世貞功  
臣表皆作添添與增音異而義同未知孰是謹附考  
淳安公主傳趣獄卒考掠之瑾乃服罪臣方煒按訊

瑾時震使人批瑾頰曰公卿朝廷所用何由汝抑汝  
何藏甲也瑾曰以衛上震曰何藏之私室瑾語塞獄

乃具見紀事本末謹附識

崇德公主傳下嫁楊煒興濟伯善孫也

臣方煒按善

大興人以右都御史迎駕南宮天順元年封卒贈侯  
子宗嗣成化元年予世錦衣衛同知見何喬遠勲封  
記謹附考

仁和公主傳下嫁齊世英

臣方煒按世英為尚寶卿

齊佑子世英尚主後詔佑遷一官不任事見王世貞

明異典述謹附考

永康公主傳嘉靖二十八年卒

臣方煒按元子驥徵

為錦衣指揮早卒無後見王世貞恩澤公侯表謹附

識

榮昌公主傳久之主薨

臣方煒按榮昌公主順治元

年七月蒙

恩賞賜贍田率其子前軍都督府帶俸都督僉事楊光益

孫錦衣衛帶俸都指揮使事楊慶餘楊蔭餘具本謝

恩銜尚稱榮昌大長公主則傳所謂久之主薨者殊失實

但究不知以何時薨茲恭照順治年間

旨詳識而仍其舊

寧德公主傳下嫁劉有福

臣方煒按寧德公主名徽

妍順治元年六月

賞城宣北坊房一所二年十月

賞百兩地二百恭照順治年間劉有福及公主謝

恩本附識如左

長平公主傳帝選周世顯尚主

臣方煒按周顯恭閱

順治三年

旨作周世顯吳偉業集所載亦同謹據改並刪本行暫字  
以符勻刻

明史卷一百二十一考證

欽定四庫全書薈要卷六千七百十五

史部

明史卷一百二十二

大學士張廷玉等奉 敕修

列傳第十

郭子興

韓林兒

郭子興其先曹州人父郭公少以日者術遊定遠言禍福輒中邑富人有助女無所歸郭公乃娶之家日益饒生三子子興其仲也始生郭公卜之吉及長任俠喜賓



客會元政亂子興散家資椎牛釀酒與壯士結納至正十二年春集少年數千人襲據濠州太祖往從之門者疑其謀執以告子興子興奇太祖狀貌解縛與語收帳下為十夫長數從戰有功子興喜其次妻小張夫人亦指目太祖曰此異人也乃妻以所撫馬公女是為孝慈高皇后始子興同起事者孫德崖等四人與子興而五各稱元帥不相下四人者粗而戇日剽掠子興意輕之四人不悅合謀傾子興子興以是多家居不視事太祖

乘間說曰彼日益合我日益離久必為所制子興不能從也元師復徐州徐帥彭大趙均用帥餘衆奔濠德崖等以其故盜魁有名乃共推奉之使居已上大有智數子興與相厚而薄均用於是德崖等譖諸均用曰子興知有彭將軍耳不知有將軍也均用怒乘間執子興幽諸德崖家太祖自他部歸大驚急帥子興二子訴於大  
大曰吾在孰敢魚肉而翁者與太祖偕詣德崖家破械  
出子興挾之歸元師圍濠州乃釋故憾共城守五閱月

圍解大均用些自稱王而子興及德崖等為元帥如故  
未幾大死子早佳領其衆均用專狠益甚挾子興攻盱  
眙泗州將害之太祖已取滁乃遣人說均用曰大王窮  
迫時郭公開門延納德至厚也大王不能報反聽細人  
言圖之自剪羽翼失豪傑心竊為大王不取且其部曲  
猶衆殺之得無悔乎均用聞太祖兵甚盛心憚之太祖  
又使人賂其左右子興用是得免乃將其所部萬餘就  
太祖於滁子興為人梟悍善鬪而性悻直少容方事急

輒從太祖謀議親信如左右手事解即信譏疎太祖太祖左右任事者悉召之去稍奪太祖兵柄太祖事子興愈謹將士有所獻孝慈皇后輒以貽子興妻子興至滁欲據以自王太祖曰滁四面皆山舟楫商旅不通非可旦夕安者也子興乃已及取和州子興命太祖統諸將守其地德崖饑就食和境求駐軍城中太祖納之有讒於子興者子興夜至和太祖來謁子興怒甚不與語太祖曰德崖嘗困公宜為備子興默然德崖聞子興至謀

引去前營已發德崖方留視後軍而其軍與子興軍關  
多死者子興執德崖太祖亦為德崖軍所執子興聞之  
大驚立遣徐達往代太祖縱德崖還德崖軍釋太祖達  
亦脫歸子興憾德崖甚將甘心焉以太祖故強釋之邑  
邑不樂未幾發病卒歸葬滁州子興三子長子前戰死  
次天叙天爵子興死韓林兒檄天叙為都元帥張天祐  
及太祖副之天祐子興婦弟也太祖渡江天叙天祐引  
兵攻集慶陳額森叛俱被殺林兒復以天爵為中書右

丞已而太祖為平章政事天爵失職怨望久之謀不利

於太祖誅死子興後遂絕有一女小張夫人出者事太

祖為惠妃生蜀谷代三王洪武三年追封子興為滁陽

王詔有司建廟用中牢祀復其鄰宥氏世世守王墓十

六年太祖手書子興事蹟命太常丞張來儀文其碑滁

人郭老舍者宣德中以滁陽王親朝京師弘治中有郭

琥自言四世祖老舍滁陽王第四子予冠帶奉祀已為

宥氏所訐禮官言滁陽王祀典太祖所定曰無後廟碑

昭然老舍非滁陽王子奪奉祀

韓林兒樂城人或言李氏子也其先世以白蓮會燒香惑衆謫徙永年元末林兒父山童鼓妖言謂天下當大亂彌勒佛下生河南江淮間愚民多信之潁川人劉福通與其黨杜遵道羅文素盛文郁等復言山童宋徽宗八世孫當主中國乃殺白馬黑牛誓告天地謀起兵以紅巾為號至正十一年五月事覺福通等遽入潁州反而山童為吏所捕誅林兒與母楊氏逃武安山中福通

據朱臯破羅山上蔡真陽確山犯葉舞陽陷汝寧光息  
衆至十餘萬元兵不能禦時徐壽輝等起蘄黃布王三  
孟海馬等起湘漢芝蔴李起豐沛而郭子興亦據濠應  
之時皆謂之紅軍亦稱香軍十五年二月福通物色林  
兒得諸碭山夾河迎至毫潛稱皇帝又號小明王建國  
曰宋建元龍鳳拆鹿邑太清宮材治宮闕於毫尊楊氏  
為皇太后以遵道文郁為丞相福通文素平章政事劉  
六知樞密院事劉六福通弟也遵道寵用事福通嫉之



陰命甲士搃殺遵道自為丞相加太保事權一歸福通  
既而元師大敗福通於太康進圍亳福通挾林兒走安  
豐未幾兵復盛遣其黨分道畧地十七年李武崔德陷  
商州遂破武關以圖關中而毛貴陷膠萊益都濱州山  
東郡邑多下是年六月福通帥衆攻汴梁且分軍三道  
關先生破頭潘馮長舅沙劉二王士誠趨晉冀白不信  
大刀教李喜喜趨關中毛貴出山東北犯勢銳甚田豐  
者元鎮守黃河義兵萬戶也叛附福通陷濟寧尋敗走

其秋福通兵陷大名遂自曹濮陷衛輝白不信大刀教  
李喜喜陷興元遂圍鳳翔屢為察罕特穆爾李思齊所  
破走入蜀十八年田豐復陷東平濟寧東昌益都廣平  
順德毛貴亦數敗元兵陷清滄據長蘆鎮尋陷濟南益  
引兵北殺宣慰使董搏霄於南皮陷薊州犯鄴州畧柳  
林以逼大都順帝徵四方兵入衛議欲遷都避其鋒大  
臣諫乃止貴旋被元兵擊敗還據濟南而福通出沒河  
南北五月攻下汴梁守將珠占遁去遂迎林兒都焉闕

先生破頭潘等又分其軍為二一出絳州一出沁州踰太行破遼潞遂陷冀寧攻保定不克陷完州掠大同興和塞外諸郡至陷上都毀諸宮殿轉掠遼陽抵高麗十九年陷遼陽殺懿州路總管呂震順帝以上都宮闕盡廢自此不復北巡李喜喜餘黨復陷寧夏畧靈武諸邊地是時承平久州郡皆無守備長吏聞賊來輒棄城遁以故所至無不摧破然林兒本起盜賊無大志又聽命福通徒擁虛名諸將在外者率不遵約束所過焚劫至

啖老弱為糧且皆福通故等夷福通亦不能制兵雖盛  
威令不行數攻下城邑元兵亦數從其後復之不能守  
惟毛貴稍有智畧其破濟南也立賓興院選用元故官  
姬宗周等分守諸路又於萊州立屯田三百六十所每  
屯相距三十里造輓運大車百輛凡官民田十取其二  
多所規畫故得據山東者三年及察罕特穆爾數破賊  
盡復關隴是年五月大發秦晉之師會汴城下屯杏花  
營諸軍環城而壘林兒兵出戰輒敗嬰城守百餘日食

將盡福通計無所出挾林兒從百騎開東門遁還安豐  
後宮官屬子女及符璽印章寶貨盡沒於察罕時毛貴  
已為其黨趙均用所殺有續繼祖者又殺均用所部自  
相攻擊獨田豐據東平勢稍強二十年闕先生等陷大  
寧復犯上都田豐陷保定元遣使招之被殺王士誠又  
躡晉冀元將博囉敗之於臺州遂入東平與豐合福通  
嘗責李武崔德逗撓將罪之二十一年夏兩人叛去降  
於李思齊時李喜喜闕先生等東西轉戰已多走死餘

黨自高麗還寇上都博囉復擊降之而察罕既取汴梁  
遂遣子庫庫討東平脅降田豐王士誠乘勝定山東惟  
陳傑頭者獨守益都不下與福通遙為聲援二十二年  
六月豐士誠乘閒刺殺察罕入益都元以兵柄付庫庫  
圍城數重傑頭等告急福通自安豐引兵赴援遇元師  
於火星埠大敗走還元兵急攻益都穴地道以入殺豐  
士誠而械送傑頭於京師林兒勢大窘明年張士誠將  
呂珍圍安豐林兒告急於太祖太祖曰安豐破則士誠

益強遂親帥師往救而珍已入城殺福通太祖擊走珍以林兒歸居之滁州明年太祖為吳王又二年林兒卒或曰太祖命廖永忠迎林兒歸應天至瓜步覆舟沉於江云初太祖駐和陽郭子興卒林兒牒子興子天叙為都元帥張天祐為右副元帥太祖為左副元帥時太祖以孤軍保一城而林兒稱宋後四方響應遂用其年號以令軍中林兒歿始以明年為吳元年其年遣大將軍定中原順帝北走距林兒亡僅歲餘林兒僭號凡十二

年

贊曰元之末季羣雄蜂起子興據有濠州地偏勢弱然有明基業實肇於滁陽一旅子興之封王祀廟食報久長良有以也林兒橫據中原縱兵蹂躪蔽遮江淮十有餘年太祖得以從容締造者藉其力焉帝王之興必先驅者資之以成其業夫豈偶然哉



明史卷一百二十二終

欽定四庫全書

明史卷一百二十二列傳附考

始子興同起事者孫德崖等四人與子興而五

臣嚴

福按與子興同起事者除孫德崖外尚有一人考明  
太祖實錄但稱俞某魯某潘某而不著其名蓋以其  
無足傳耳王鴻緒明史稿遂訛作一人稱俞魯潘等  
傳中從刪殊合史闕文之義謹附識

元師復徐州

臣嚴福按托克托復徐州在至正十二

年九月見元史順帝紀蓋即子興起事之本年也謹  
附考

邑邑不樂未幾發病卒

臣嚴福按郭子興卒在至正

十五年三月見明太祖記附識

是年六月福通帥衆攻汴梁

臣嚴福按劉福通攻汴

梁通鑑載在至正十七年八月與此互異考元順帝  
紀載六月福通犯汴梁八月陷大名衛輝路自當以  
元史為正謹識

是年五月大發秦晉之師會汴城下屯杏花營諸軍環城而壘林兒兵出戰輒敗臣嚴福按察罕特穆爾克汴通鑑載在至正十九年八月與此互異當是發兵在五月耳謹附考

又二年林兒卒

臣嚴福按林兒之卒通鑑載在至正

二十六年十二月明祖之稱吳王在至正二十四年其中止間一年此云又二年蓋謂稱王之又次年也

謹識

明史卷一百二十二列傳附考